



Сембе масторонь пролетариятне, пуромода маре!

ЛИСЕНДИ V-це КИЗОСЬ

Мокшэрзянь ВЛКСМ-нь  
обкомть и Саранскяень  
горкомть газетасна

Адресь: г. Саранск, ул. Ленина 11,  
телефон № 1—72.

ИЮНЬ  
30-ЦЕ ШИСТОНЗА  
1937 КИЗОНЯ  
71 (445)

Лисенди ковти 12-кеть.

## СЕВЕРНАИ ПОЛЮСУ ЭКСПЕДИЦИЯНЬ УЧАСТНИКНЕНЬ КАЗЕМАСНОН КОЛГА

СССР-нь Центральной Исполнительный Комитетть путфксоз

СССР-нь Центральной Исполнительный Комитетть путнесы:  
Правительствать заданиянц образцовайста пашкедеманц инкса и  
героизмакса Севернай экспедициянь участникнень, конат сатозь Се-  
вернай полюсть и тисть полярнай станция полюсть ваксса дрейфую-  
щай эй лангс, каземс:

Советский Союзонь Героень званияса, тьяка пингть максомс  
Ленинонь орден:

1. О. Ю. Шмидтонь—экспедициянь начальникконц.
2. И. Т. Спиринонь—майорть, экспедициянь флаг-штурманонц.
3. М. И. Шевелевонь—экспедициянь начальникъ заместителенц.
4. И. Д. Папанинонь—„Севернай полюс“ станциянь начальни-  
конц.
5. А. Д. Алексеевонь—„Н—172“ самолетть командиронц.
6. И. Т. Мазуруконь—„Н—169“ самолетть командиронц.
7. Т. Г. Головинонь—„Н—166“ самолетть командиронц.
8. М. С. Бабушкинонь—„Н—170“ самолетть командиронц.

Ленинонь омбоце орденца:

1. М. В. Вод пъяновонь—Советский Союзонь Геройть, „Н—170“  
самолетть и отрядть командиронц.
2. В. С. Молоковонь—Советский Союзонь Геройть, „Н—171“ са-  
молетть командиронц.

Ленинонь орденца:

1. М. И. Козловонь—„Н—169“ самолетть омбоце пилотонц.
2. Г. К. Орловонь—„Н—171“ самолетть омбоце пилотонц.
3. Я. Д. Мошковскяень—капитанть, „Н—172“ самолетть омбоце  
пилотонц.
4. А. А. Догмаровонь—экспедициянь парторгонц.
5. Э. Т. Кренкелень—„Севернай полюс“ станциянь радистонц.
6. П. П. Ширшовонь—„Севернай полюс“ станциянь научнай  
сотрудниконц.
7. Е. К. Федоровонь—„Севернай полюс“ станциянь научнай сот-  
рудниконц.
8. А. А. Ритсландонь—„Н—171“ самолетть штурманонц.
9. Н. М. Жуковонь—„Н—172“ самолетть штурманонц.
10. Ф. И. Бассейнань—„Н—170“ самолетть васеньце бортмеха-  
никонц.
11. К. Н. Сугрובовонь—„Н—172“ самолетть васеньце бортмеха-  
никонц.
12. В. Л. Ивашинань—„Н—171“ самолетть васеньце бортмеха-  
никонц.
13. Н. Л. Кекушевонь—„Н—166“ самолетть васеньце бортмеха-  
никонц.
14. Д. П. Кекушевонь—васеньце рангонь воентехникть, „Н—169“  
самолетть васеньце бортмеханиконц.
15. Н. Н. Стромилонь—„Н—171“, „Н—166“, и „Н—169“ само-  
леттень радиотехниксна и борт-радиотехника.
16. С. А. Ивановонь—„Н—170“ самолетть борт-радиотехник.

Краснай звездань орденца:

1. Л. Г. Крузень—„Н—128“ разведывательнай самолетть коман-  
диронц.
2. Б. Л. Дзержевскяень—экспедициянь синоптикть.
3. К. И. Морозовонь—„Н—170“ самолетть омбоце бортмехани-  
конц, экспедициянь эса 24 № заводть представителенц.
4. П. П. Петенинонь—васеньце рангонь воентехникть, „Н—170“  
самолетть омбоце бортмеханиконц.
5. В. Н. Гутуовскяень—экспедициянь инженеронц.
6. И. Д. Шмандинонь—„Н—172“ самолетть омбоце бортмеха-  
никонц.
7. С. К. Фрутецкяень—„Н—171“ самолетть омбоце бортмехани-  
конц.
8. В. Д. Терентьевонь—„Н—166“ самолетть омбоце бортмеха-  
никонц.
9. Д. А. Тимофеевонь—„Н—169“ самолетть омбоце бортмехани-  
конц.
10. В. Г. Гинкинонь—васеньце рангонь воентехникть, „Н—172“  
самолетть омбоце бортмеханиконц.
11. В. И. Аккуратовонь—„Н—169“ самолетть штурманонц.
12. А. С. Волковонь—лейтенанть, „Н—166“ самолетть штур-  
манонц.
13. М. А. Трояновскяень—экспедициянь кинооператоронц.

Трудовой краснай знамянь орденца:

1. Л. М. Рубинштейнань—штурманть—„Н—128“ разведыватель-  
най самолетть радистонц.
2. И. Г. Кистановонь—техникть, „Авиаприбор“ заводть пред-  
ставителенц.
3. Я. Брезинкань—„Н—128“ разведывательнай самолетть меха-  
никонц.
4. Е. Г. Радоминовонь—колмоце рангонь воен-инженерть.
5. Л. К. Бронтманонь—„Правда“ газетать спец. корреспонден-  
тонц.
6. Э. С. Виленскяень—„Известия“ газетать спец. корреспонден-  
тонц.

Максомс денежной премия:

а) кажнайти 25 тьожанть цалковайхть—Водолянов, Молоков,  
Шмидт, Спирин, Шевелев, Папанин, Алексеев, Мазурук, Головин и  
Бабушкин ялгатненди;

б) кажнайти 15 тьожанть цалковайхть—Козлов, Орлов, Мош-  
ковский, Догмарев, Кренкель, Ширшов, Федоров, Ритсланд, Жу-  
ков, Бассейн, Сугрובов, Ивашина, Текушев, Шекуров, Стромилонь  
и Иванов ялгатненди;

в) кажнайти 10 тьожанть цалковайхть—Крузе, Дзержевский,  
Морозов, Петенин, Гутуовский, Шмандин, Фрутецкий, Терентьев,  
Тимофеев, Гинки, Аккуратов, Волков и Трояновский ялгатненди;

г) кажнайти 5 тьожанть цалковайхть—Рубинштейн, Кистанов,  
Брезен, Радоминов, Бронтман и Виленский ялгатненди.

СССР-нь Центральной Исполнительный Комитетть председате-  
лец М. КАЛИНИН.

СССР-нь Центральной Исполнительный Комитетть секретаренц  
И. АКУЛОВ.

Моску, Кремль. Июньть 27-це шистонза 1937-це кизоня.

### Московский комсомолецнень героический полярникнень марта васьфтемасна

Июньть 28-це шистонза Моску-  
са Союзонь кудть колоннай зал-  
сонза Московский комсомолецнень  
ульсь встречасна героический со-  
ветский полярникнень—Севернай  
полюсу экспедициянь участник-  
нень марта. Седи вакса залса  
присутствующайхне васьфтезь пре-  
зидиумть шранц вакс мольф Со-  
ветский Союзонь геройхнень—Во-  
доляновть, Спиринть, Бабуш-  
кинть, Алексеевть, Головинть, Ше-  
велевть и орденоносецнень Догма-  
ровть и Мошковскяйт.

Пуромксса примсесть участие  
ВЛКСМ-нь ЦК-ть секретаренца  
Косарев и Лук'янов ялгатне.

ВЛКСМ-нь МК-ть и МГК-ть сек-  
ретарец Ильинский ялгась, пан-  
жемок пуромксть, азсь комсомолть  
лемста пламенной паравал Север-  
най полюсть покорителензонды.

Главсевморпутень Политуправле-  
ниянь начальникъ Бергавинов ял-  
гать нюркьян докладтонза меле  
ушедсь кортама Водолянов ял-  
гась, кона ульсь васьфтьф аваци-  
яса. Сон экспедициянь участник-  
нень лемста азсь большевистский  
паравал Московский комсомолец-  
неньди.

Водолянов ялгать Севернай по-  
люсу героический лиеманц колга  
башка эпизодонь интереснай и  
увлекательнай рассказоз аф весть  
связендесь аплодисментса.

Пуромксть аделаманцы сась  
Советский Союзонь геройсь ака-  
демиксь О. Ю. Шмидсь, кона кор-  
тась оцю яркой речь. Пуромксь  
васьфтезе академикть-большевикть  
бурнай авацияса.

Пуромксса станя жа кортасть  
Советский Союзонь геройхне Ше-  
велев, Бабушкин, Спирин, Алек-  
сеев, Головин ялгатне и орденон-  
сецсь Мошковский ялгась.





СНИМКАСА: Саранскийса Московский ульцяса строяви полнай средней школа.

Фотось Веретенниковъ.

## ОЦЮ МЯЛЬСА УЧТАМА ОД ЗАЙМАТЬ НОЛДАМАНЦ

Чамзинкань района предприяйтнень, колхознень и учрежденийнень эзга ульсть йотафт митингт и марстонь пуромкст оборонань кемекстамань займать нолдаманц колга.

Пенькозаводонь рабочайхне, стахановецне и инженерно-технический работникне эняльдихть правительствати, штоба курокона нолдамс оборонань кемекстамань займать.

— Минь странанеке ащи непроступнай крепостекс.

Комбайнерхне: Варинев, Брошкин, Вдовин ялгатне слесарьсы Маркин ялгась и Чамзинкань МТС-нь сембе рабочайхне аф кирьдёмшка учихть од займать нолдаманц эса, штоба васеньцеко подписаться займати.

Васендакиге подпишемся оборонань кемекстамань займати заявили синь единогласно.

Хлыстовский и Пичурский в-советонь колхозникне резолю-

цияв сьормадсть: сембе, кода фкя ломань, максаськ трудовой сбережениянькень госу-дарствати, штоба щамс ро-динанькень непроницаемой бронья.

Пяшкецаськ Сталин ялгать лозунгонц: максомс странати 7—8 миллиардт пуд кши.

Почтань работникне приветствовандасазь и вешихть правительствати ширьде сяда курокона нолдамс оборонань займать.

Чамзинкань призывной пункта призывникне марстонь пуромксса, конац посвященной СССР-нь оборонань кемекстама займать нолдаманцы азозь.

Максетяма обязательства, што 1937 кизонь сьоксенда са-тама призыву аноклафста, штоба Рабоче-Крестьянский Як-стерь Армиянь рядтнень эса улемс примернайкс и достой-най боецке.

М. Т.

## Работасть отличнайста

Д. Усодонь велеса „Ударник“ колхозса паринань сокамаса Атю-ренъ МТС-ста работась 15-це бри-гадась.

Трактористне, коват работасть тьса, работаса няфнеть пьк це-бяр показателхть — нормаснон-пяшкедькшезъ вельф. Васинсь и Кичигинсь 7 гектар норматъ-васте суткати соксестъ 9 гекта-

ронь, Сауткинсь и Уляшинсь ка-фонест суткати соксестъ — 20 гек-тарх. Тишкинсь и Сайгинсь — 22 гектарх.

Марнек ть колхозса сокаф пари-нада 1730 гектарх. Сокафть ка-чествань отличнай. Ть бригадась-станя жа работась паринань сока-маса и лия колхозга.

Рюков.

## Вишкен темс комбайнерхнень йоткса соцсоревнованиять

Мамолаевань МТС-нь комбайнер-хне сергядкшнесазь социалистиче-ский соревнованис Рыбкинань МТС-нь комбайнерхнень тьятама обязательства марта:

Работамс оцю качества марта (потеряфтома).

Саратовский комбайнаса урядамс 600 гектарх, а севернайса 450 гек-тарх.

Уборкати аделамдонза меле мак-сомс комбайнатнень прокс исправ-майста.

Сявсть обязательства, штоба

июнь 20-це шинсты самс комбай-натне улест сембе исправнайхть и анокламс эстиесть помощникт.

Тяда башка комбайнерхне кар-майхть касфтома техникань содама-шиснон.

Июльть васеньце шинсты самс комбайнерхне МТС-нь дирекцият-нень ширьде вешихть, штоба улель сатомшка анок горючай и штоба максольхть культурно-бытовой ус-ловият.

Рыбкинань р-н

Ф. Кечкин

## Выборхне йотасть цебарьста

Июнь 19-це шистонза Еж-кань афполнай средняя шко-лань комсомольский организа-цияса ульсь закрытай отчетно-выборнай пуромке. Пуромксса комсорге Кулагина ялгась тисъ отчет, коса азозе комсо-мольский организациять рабо-танц.

Отчета меле кортасть пре-нияса лама комсомолецт, конат азозь комсомольский организа-циять бездействанияц.

Выступающийхне азозь, што комсомольский организациясь кодамовок массово-просвети-тельной работа ашезь вьате, кальдявста ладяфоль полит. учебась.

Тя пуромксса лама корта-фоль и пионер-организациять колга, коса работась организо-вандаф пьакальдявста. Пионер-

ский сборхт аш. Пионер-вожа-тайсь Долговась кортай, што ть пингс школань дирекциясь ашезь рама кодамовок спортив-най принадлежность (футбол, барабан, знамя) и тьярс пио-нерхнень аш галстуксненок.

Комсомолецне кеместа кри-тиковандазь ВЛКСМ-н рай-комть работанц Комсомоль-ский организацияти райкомсь нилешка ков ашезь максась ко-дамовок лезкс. Тянь сюнеда комсомолецнень дисциплина-на пьак лафча, успеваемостьна и посещаемостьна тожа аф пьак цебарь.

Закрытай (тайнай) голосо-ванияса комсоргокс кочкаф Кулагина ялгась Районнай конференцияв кочкафт Кулагинась и Долговась.

Афтайкин.

Ковылкинань р-н

## Коза вяти политический беспечностьсь

Комсомолонь вайгяль газетать редакцияц эрь шиня получай каф-та-колма корреспонденцият Шай-гавонь района комсомольский организациятнень кальдяв рабо-таснон колга. Получаф сьормат-нень эзда можна тиесм тьятама вывод, што ВЛКСМ-нь райкомсь сембе работать вьатезь кабинетно-бюрократический стильса.

Колхознай комсомольский орга-низацияда ВЛКСМ-нь райкомонь работникне пелихть, синь рабо-таснон цебарьгафтомаснонды аф лездыхть.

Аф ваномок сянь лангс, што „Комсомолонь вайгяль“ газетать эрь номерсонза печатлакшневихть колхознай комсомольский органи-зациятнень кальдяв работаснон колга, но райкомсь кодамовок вы-водт аф тиеньди.

Теризморгань комсомольский организацияста тейнек тьястихть, што афсоюзнай од ломаньтнень ули оцю мяльсна сувамс ВЛКСМ-нь членкс, но комсомольский органи-зациясь аф разбирадакшнесыне комсомолу максф заявлениятнень. Василий Кар. инць ВЛКСМ-нь членкс заявление макссь нинге 1936 кизоня и тьячимс атак разбирадак. Ком-сомолецне полит. школаса аф то-нафнихть, комсомольский пуромкст аф эряйхть.

Тя организацияти 1936—1937 ки-зоня ВЛКСМ-нь райкомста фкя-вок работник ашезь яка.

Аф сяда лац работайхть район-ца и илядыкс комсомольский ор-ганизациятневок.

Тя аф случайность, што Шайго-вань района распушеннайхть комсомольский организациятнень работасна. Шайговань ВКП(б)-нь и ВЛКСМ-нь райкомтнень эса ла-ма пиньге вьатезь эсь подлай ра-ботаснон народонь врагтне (Бажа-новсь и Фенинць), конат эсь под-лосьтснон марта вредили пар-тийно комсомольский работати.

ВЛКСМ-нь райкомть ингольденъ пингень секретарец Фенинць лама пиньге васькафнезе и ВЛКСМ-нь обкомтьке Сон ВЛКСМ-нь обком-ти макссесь ВЛКСМ-нь райкомть работанц колга ложнай сведения, а обкомсь атак проверьк Шайго-вань райкомть работанц лувондозе пьак цебаренди.

Тя политический беспечностьсь макссесь Фенинцти авторитет, вь-темс эсь троцкистско-бухаринский вредительский деятельностьнени райкомса.

Обкомсь содазе, што Фенинць ингольденъ пингень ВКП(б) нь райкомть секретарец кадровой троцкисть Бажановть марта район-ца вьатсь открытай троцкистский работа. Но ниясак обкомсь мезе бди учсь — эсь пингстонза ашезе разоблачинада маскаса ащи врагть.

Н. Алемаев.

## Комсомолець тракторист—ударник

Минь социалистический страно-сонок, кода ошса, а тьяфта жа ве-леса стахановецне няфнихть эсь работасост трудонь производитель-ностень величайшай показателхть.

Тя кортай сянкас, што стахано-вцеце седи вакса кельгсазь панч-фокс-панжи социалистический ро-динаконь. Синь работайхть чест-найста и добросовестнайста.

А честнайста синь работайхть сяе, мес работайхть эсьтиест, а эф помещикти, кулакти али капи-талистти, кода лия странаса.

Сявсась Атеняев ялгать трак-торнай бригаданц. Тя тракторнай бригадась работай образцовайста.

Вов трактористсь Семен Макси-мович Девинь ялгась. Девинць па-ринань сокамаса норматнень пьш-кедькшнесыне ламода вельф. Со-камань нормась 4 гектарх а, Де-винць сокай 7—8 гектархт сме-

нати.

Семен Девинць комсомолец. Комсомольский организацияса сон лувондови примернай комсомоле-цекс.

Бригадирсь Атеняев ялгась и комсомолець—трактористсь Де-винць мольтхить оцю массово-просветительнай работа сембе трактористтнень йоткса.

Эрь шиня синь молафнихть га-зетт, журналхт, молафнихть и ху-дожественнай литература, кино.

— Колхознай трудсь 3 весья и радостнай, — кортай Девинць, кол-хозса сай работаме. Вдь колхоз-са азорхне миньць — колхозникне. Честнайста и добросовестнайста работамась кандь польза совсьтей-нек — колхозникненьди.

Н. Ямашкин.

Шайговань р-н,

Теризморга велес.



## СПАСИБА ПАРТИЯТИ И КЕЛЬГЕМА СТАЛИН ЯЛГАТИ

Муздрам училищав сань 1932 кизоня. Тонафнень училища аныцек отличнай и цебярь отметка марта. Отличнай-ста тонафнемазень инкса монь училищань дирекциясь ламоксть казема ньитни вешаса и получань кафта почетнай грамотат.

Ня сатфксенень мон сатыне аныцек упорнайста эсь лангсон работамать марта и соцсоревнованиять вельде.

Тяда башка чувствовал, што мон комсомолецан и кда кальдав отметка марта тонафнемс, тя улеь ба позор аф аныцек теень, но и комсомольский организацияти.

Испытаниятнень сембе дисциплинатнень коряс максыне аныцек отличнай отметка марта. Зачетнай спектакольхнень эса („Русалка“, „Фауст“) оператнень налкомста получань отличнай оценка.

Аныцек советский власто макссь тейнек прават: трудти, образованияти и ваймамат, конатнень кемекстазень Сталинский Конституциясь.

Мон максан обещание партияти, правительствати и Сталин ялгати, што сембе полукаф знаниятнень макссайне Мокшэрзянь искусствать процветаниянцты.

В. Киушкин.

## Культмассовой работась юкстаф

Аватнень йоткса массовой работать юкстаз

„Валда ян“ колхозса кочкихнень йоткса кодамоков культмассовой работа аф йотафневи. Беседат аф эряйхть, газетат аф пачфневихть бригаднай газетат аф нолневихть. Тянь лангс аф партийно-комсо-

мольский организациятне, аф колхозонь правлениясь кодамоков мьяль аф шарфнихть.

Битрух.

Ковылкинань р-н,  
Ежка веле.

## Тонафнень отличнайста

Муздрамучилищав мон поступил 1932 кизоня. Кельгемоктя специальностьть монь сембе стремлениязе ульсь, штоба тонафнемс аныцек отличнайста.

Васендакигя мон кярмедень соцсоревнованиянь и ударничества ньитни методтненьди. Аныцек соцсоревнованиять вельде мон сатыне отличнай отметка марта тонафнемать.

Тяда башка мон вятень школаса общественной работа и лездонь отстающей студентненьди.

Испытаниятнень сембе дисциплинатнень коряс максыне отличнай отметка марта.

Мон надиан, што практический работамазень пингста карман няфнеме тяфтама жа отличнай результатт кода и тонафнемста.

Ф. Чистов.

Саранск ош.

## Желаниязе пашкедевсь

Нинге мзярда работань колхозса мон примсень активной участие самодетельнай кружокнень эса. Но монь сембе тя ашезе петня мязезень, сяс мес ашель актерский способностезе, а тонадомс актеркс ульсь оцю мязезе.

Штоба повомс постояннай советский сцена, няйсак эряви шумордам специальной школа. Ушедонь аноклама. Лувонь начальнай школань 3-це группань обемса учебникт, тонадонь колмоце классонь задачань решандама и арьсень, што магу тьяни повомс актерский школав. Мзярда мон максыне документонень Саранск ошень муздрамучилищав, дирекциясь примамать колга отказась сяс, мес ликбезонь образованиязе. Мон илядонь муздрамучилищав вольнай слушателькс. И аныцек учебнай кизоть кучкастонза приймамаз основноу актеровский отделеияти.

Штоба аф илядомс ялганень эзда, мон упорнайста работань эсь лангсон, тяда башка оцю лезкс макссь монь цебярьста тонафнемазти ВЛКСМ-нь комитетсь.

Эряви азомс, што тонафнень аф кальдавста. Сембе учебнай кизотнень эзда отметкане аныцек отличнайхть и цебярьхть.

Испытаниятнень максыне сембе дисциплинатнень эса отличнайста. Сембе желаниезе улемс актеркс пашкедевсь.

Зиновьев.

## Получань отличнай диплом

Монь мечтазе арамс актрискакс пашкедевсь.

Муздрамучилищать аделайне аныцек отличнай отметка марта.

Ня оцю сатфксенень сатыне соцсоревнованиянь методтнень вельде. Получань диплом улемс советский актрискакс.

Тянка мон азан спасибо партияти и кельгема Сталин ялгати.

Сернова.



Муздрамучилищань студентне—отличниктне.

Кяржи ширеста: Ларионов, Зернова, Галинина, Зиновьев и Юшкин ялгатне. (Фотось ВЕРЕТЕННИКОВТЬ)

## Васенце кадратне

Мокшэрзянь музыкально-драматический училищась васенцеда нолдай искусствань од кадрат.

Выпускной группаса сембец лувондови 21 ломаньт. Синь эздост драматический театрань актерда 8 ломаньт, инструкторда-педагогта 6 ломаньт, хоровой кружоконь руководительда 2 ломаньт и моронь морайда 5.

Нят од кадратнень йоткса мокшэрзяда сембец лувондови 7 ломаньт. Мокшень и эрзянь сисем стирьнят и цюрот аделазь музыкально-драматический училищать и арасть Мокшэрзянь народть искусстванц ингольдень рядонцты.

Эряви азомс, што выпускной группань студентне тонафнесть оцю сатфкс марта. Синь эздост отличникта 11 студентт (Киушкинц, Кулаковась, Ушаковась, Галинись, Зиновьевсь, Тягушевась, Ларионовсь, Серковась и Ельсовсь). Отличнай и цебярь отметка марта тонафнесть 6 студентт и 5 студентне тонафнесть посредственной отметка марта.

Тя аф секрет, што минь страна-сонок эрь кизонда учебнай заведениятне нолдайхть аф фкия тьожань фельдшерхт и врачт, техникт и инженерхт, агрономт и учительхт, артистт и лия квалификациянь кадрат, и сембе синь рабочаень и колхозниконь идть.

Кой-кона комсомолецне и аф-союзная одлонаньтне аф макссихть тя фактит эрявикс значение.

Тяни аф кржа мокшень народть цюронзон эзда инженерда, врачта, артистта, конатнень касфтозень, тонафтозень и воспитандазень советский власто и большевистский партиясь.

Тя аф кальдав. Тяфта и эряви-мьяргтыма минь. Но вдь эряви содамс и аф юкснемс, што революцияда ингольдень варварский Россия мошкетнень афолезь лувонда ломанькска.

Революцияда инголе минь атынеке, алынеке и браннеке—сембе беднайхне йофсикс мезевок ашесть арьсекшне, штоба тонафнемс техникос, инженеркс, врачекс али артистокс. Синь эрясть пяк шовдаста и люпштафта, униженнайста и оскорбленнайста, синь няендезь и шарькодкшнесть, што наукась теест недоступнай вершина.

Эряви содамс и сявок, што буржуазнай государстватнень эса минь браннекен, беднай народть эряфон пяк стака. Фашистский Германияса, Италияса, Японияса одломаньтнень школава аф тонафнесазь. Фашистский варвархне одломаньтнень тонафнесазь аныцек военной тевти—ломанень шавондома.

Аныцек минь социалистический родинасонок одломаньтненьди и сембе советский граждантиеньди максфт сембе возможностьтне тонафнемати. Мьяльце врачекс—тонафнек, улят врач, мьяльце инженеркс—тонафнек, улят инженер, мьяльце улемс артистокс—тонафнек, улят артист.

Советский власто, Ленинонь—Сталинонь партиясь, человечествовать величайшай гениенц Сталин ялгать руководстванц вельде максозь тейнек, советский одломаньтненьди и сембе народти, сембе возможностьнень тонафнемс, тонафнемс и тонафнемс.

Тяни ингольдень постуфонь цюратне арьсхть техникос и инженеркс, врачекс, агрономкс и учителькс, артистокс и государственнай деятелькс.

Сяс минь и кельгсась миньцен социалистический родинаконь. Кельгсась Ленинонь—Сталинонь партиянь. Кельгсась человечествовать величайшай гениенц, минь вожденекен, учительнекен и алынекен—Сталин ялгать, кона макссь тейнек счастливый и радостнай эряф.

Горьканов.

## Примернай конюх

Буденнайть лемса колхозса, колмоце бригадаса конюхокс работай Девин ялгась.

Сон пяк оцю мьяль шарфни эсь работанцты, сон кельгсь работанц и работанц тьендсь пяк честнайста и добросовестнайста.

Тяни колхозникне работайхть эсьтеест. А вдь царский рос-

сияса работакшнесть помещикненьди и капиталисттненьди.

Тяни шарькодзень колхозникне, што трудсь ащи—честекс кажнай советский гражданинни.

Девин ялгась ламоксть ульсь казф питьни казнеса. Ламоксть ульсь районнай слетса.

К.

Шайговань р-н.



Муздрамучилищань—отличниксь Чистов ялгась.



## ЮНКОРХНЕ СЬОРМАДЫХТЬ

## 105 од учительхть

Тядень кизоня Мокшэрзянь педучилищась нолдась 105 квалифицированной од учительхть.

Синь йоткстост 19 ломатть физкультурникт, 19 ломатть дошкольной воспитательхть и 67 начальнай школань учительхть.

Тя выпускть эзда ламоц студентнень йоткста испытаниятнень максозь отличной отметка марта. Кепетьксонди, Тюринась, Марюшкинц, Сорокинц, Янинась, Гулинась, Барыкинась и лиятне получасть диплом отличной отметка марта.

Ня ялгатне выпускной вечера сясвсть обязательстват школаса работамс партиять и правительстват требованияхон коряс. Таконь шовор сядат тов кепедемс эсь производственной квалификациейхон заочной курсенень вельде высшай образования.

Самошкин С.

о о о

## Получандатама похвальной грамотат

Саранскяень 31-це № железнодорожной полнай средняй школань 10-це классонь ученикне: Бойко, Матейкинень, Свойкин, Башкетов, Карев сясвсть эсь лангозост обязательстват, штоба испытаниятнень максомс аныцек цебяр и отличной отметкас и получандамс школать аделамста похвальной грамотат.

А.

## А. М. Горькийть памятенцы вечер

Июньть 22-це шистонза Мокшэрзянь рабфакса ульсь йотафтф великай русский пролетарский писательть А. М. Горькийть кулома шинцы посвященной траурной вечер.

Вечерса преподавательсь Семенов ялгась азондозе А. М. Горькийть эряфонь кинц и сонь величайшай бессмертной творчестванц.

Тяда башка сят студенттне, конат сьормадкшнесть Горькийти сьормат, азондозь сьорматнень содержанияхон.

Тянь эзда няеви, што Алексей Максимовичсь кирьць оцю соткс одушеды писательхнень марта. Сон теест макссесь советт, указаният.

И. Дунаев.

Саранск оп.

## Аф аноклайхть сьоронь урядамат

Шубриков ялгать лемса колхозсь йофикс аф аноклай сьоронь урядамат. Сьоронь урядамат инвентарсь тячимс апак аноклак.

Мон аф содаса кода ваны тянь лангс рйонц, но содаса, што колхозонь правлениясь надият „авосьть“ лангс.

\*\*\*

Эряви азомс и сявок, што кочкихнень йоткса культурно-массовой работа аф вятев.

Тя калдяв работат сьонедат ламоц кочкихнень йоткста производственной нормасхон аф пашкедьшнесазь.

М. А.

Ковылкина р-н.

## Павазу идьтне

Кодама цебяр и весяла эрямась минь социалистическай странасонк. Минь родинасонк эряйхть инь павазу идьтне.

Минь няйсась, конашкава заботендайхть минь идьнекен инкса партиясь, правительствась и кельгема вожденьке Сталин ялгась.

Минь колхозсонк ули идень сад и площадка. Колхозницатне работам пингстост идьсон кадондсаз идень саду, площадкав. Синьц туйхть цебяр мальяса работам. Синь содасазь, што синь идьсон воспитывают коллективной эрямати, эсь пингстост андсазь, эсь пингстост ваймафтсазь.

Суват идень саду и аныцек радовакшнат. Идьтне налксихть, морайхть, сай лангозост ваномаче.

Минь идьнеконь инкса заботендаманкса астама спасибо партияти, правительствати. Спасибо кельгема вожденьконьди Сталин ялгати счастливый и радостный эряфть инкса.

И. С. ПАРШИН.

Зубово-Поляна, Н-Выселки.

о о о

## Примернай колхозницат

Сире Теризморга велеса, Буденнай ялгать лемса колхозса улихть цебярста работай колхозницат, конат работайхть 4-це бригадаса. Синь кизонь перьф активнайста работайхть, а особенно сьоронь кочкома пингть.

Вов Атиняева Нинась, сон аф кунара сувась колхозу и няеви, што работай добросовестнайста, фкявок ши аф йотафни апак работак.

Тяфта жа цебярста работай Вазьнина Еленась. Работай омбоце кизось звеноводкакс. Цебяр работанкса сон 1936 кизоня ульсь казф пурпкаса. Цебярста работай синь бригадирена Макаров ялгась.

Тя честнайста и добросовестнайста работасхон марта, синь няфнихть пример аф аныцек колхозникненьди и колхозницатненьди, но и единоличникненьди.

Сяс и тя кизонь тундаты сувасть колхозу лама единоличникт.

Девин.

Шайговань р-н.

о о о

## Мес аш яслят?

Лама ни йотни пинге, кода ушептоветь яровойхнень кочкомасна, штоба эсь пингстонза йотафтосе тя важнай работат колхознень эзга панчсехть идень яслят, идень садт, штоба идь марта аватненьди улель кода модемс работам.

„Валда—ян“ колхозса аш идень яслят, аш идень сад. Тянь сьонедат идь марта аватне работам аф якайхть.

Колхозницатне вешихть, штоба маластонь пингть, сьоронь урядамат панжельхть идень яслят и идень сад.

Т. Л.

Ковылкинский р-н.

ИСПАНИЯСА ФРОНТТНЕНЬ ЭЗГА  
(ТАСС-ть СООБЩЕНИЯХОН КОРЯС)

## Центральнай фронтсь

Июньть 27-це шинц карша веть мятежникне тяряфнесть тиёмс атака Карабанчельса республиканецнень позицияхон лангс. Мятежникне сязсть мина, калафтомок кудть, конанц, однако нинге сядат инголе кадондозь республиканецне. Взрывсь ульсь республиканецнень окопсон эзда несколько метрань вастса. Взрывда меле республиканецне тисть контратака. Бойсь молись веньперьф. Результатсь стама, што кафецьке ширетне ванфгозь эсь позицияхон.

Каса де Кампоса республиканецне калмотнень района атакован. Дазь противникть позицияхон. Калмотнень пясенон занязь республиканецне, конат кружазь противникть позицияхон. Тоннельхнень, конатнень сооружили мятежникне, пулеметса и мортарса республиканецне частична калафтозь. Тоннельхнень эзда выходтне ашихть республиканский войскатнень лянцендемань толсон ала.

Харама и Тахо ляйт юг ширьденек секторса, а стания жа Авилань секторса Навальпераль де Пинарес и Эль Тиёмбло районга—мятежникнень сембе атакасна отбитахть.

Севернай фронтсь  
БИСКАЙСКИЙ УЧАСТКАСЬ

Республиканецне тисть успешнай атака Миронь пандса мятежникнень позицияхон лангс.

## Мес валхтозь работаста?

Колхозса комсомолецсь Сайгин ялгась лувондовсь инь цебяр конюхокс. Сонь алашанзон упитанностьсна ульсь цебяр.

— Кельгине конюхокс работазень,—кортай Сайгин ялгась. Сон шинек венек ванондсь алашатнень мельгя. Шити колмокссть чистендакшнелезень, симделезень—андозень нормативть коряс.

Тяда башка Сайгин ялгась лифнезень лангу колхозонь правления работастонза сембе безобразиятнень. Сон ламокссть колхознай марстонь пуромкса настивал, штобы бригадир Козеевть валтомс работастонза, сонь бездеятельностенц инкса.

Сяс мес Сайгин ялгась вяць тюрема разгильдяйстват каршесонь бригадирсь Козеевсь валхтозе конюхокс работаста.

Сайган ялгась аф законна работаста валтоманц инкса энлядькшнесь колхозонь правления инголе, штоба проверямс фактнень и примамс мерат виновникть марта, но сонь энлядеманицы кодамовок мьяль правлениясь тячимс ашезь шарфта.

И. Трёмаскин.

С. Любимкин.

Ковылкина р-н,  
Ежка веле.

Пособиять явандозь аф  
нуждающей ученикненьди

Исса—Прянь средняй школань дирекциясь ярмаконь и лия пособиятнень явандозень аф нуждающей ученикненьди. Кепетьксоньди сясвась 8-це класста Арбузов ученикть, конанц получасть ярмаконь пособия, а сонь тяряц торгавай винаса.

А вов ученикты А. Фирсовти, конанц аш алая, аш теряц, а кодамовок пособия ашесть макс.

РайОНО-ти эряви ваномс Исса-Прянь средняй школань учителень аппаратть.

М. А. Д.

Исарский район.

## Клубсь пякстаф

Насакинань велень советса, Куй бышевть лемса колхозса кодамовок культурно-просветительнай работа аф вятев.

Ули цебяр клуб, коса заведующайкс работай Кидлев комсомолецсь, но сон вестенге ашезе панчсе клубть.

Вальманза клубть тапафт, потмосонза всякай мусор.

Афсоюзнай одломаньтнень йоткса кодамовок работа аф мольтф.

теви, а вдь синь ули желаниясна морафнемс газетат, журналхт и художественной литература.

Мон аф содаса мезенькса пандыхть Кидяевти зарплата.

Минь надиятама ВЛКСМ-нь Торбеевань райкомть лангс, што сошарфты тя теви эрявик мьяль и ладасы культурно-просветительнай работат.

Рюков.

Торбеевань район.

## ПРИМСЕВИ ПОДПИСКА

ШИ ВЕЛЬФ ЛИСЕНДИ

## „КОМСОМОЛОНЬ ВАЙГЯЛЬ“

РЕСПУБЛИКАНСКИЙ КОМСОМОЛЬСКИЙ ГАЗЕТАТЬ ЛАНГС

ГАЗЕТАТЬ ПИТНЕЦ

1 ковс—60 трыошнект, 3 ковс—1 ц. 80 трыошнект.

6 ковс—3 ц. 60 трыошнект. 1 кизос—7 ц. 20 трыошнект.

Подпискать примсесазь сембе почтовой отделениятне и сьормань каннихне.

6—6

Ответ. редакторть инкса П. ЕЖОВ.

Уполномоч. главлито № Д—71. Заказ № 1994. Тираж 1523.

г. Саранск, типография „Красный Октябрь“.